



Projetu Suai Supply Base: Dezenvolvimentu ka Ameasa?

Mahein Nia Lian Nú. 57, 29 Agustu 2013



Relatoriu Ida ne'e Suporta Atividade Departamentu Harii Paz no Koezaun Sosial ho Suporta Orsamentu husi UNDP Timor-Leste no Embaxada Finlandia iha Jakarta



I. Introdusaun

Planu Estratejiku Dezenvovlimentu Nasional - PEDN maka sei implementa projetu lubuk ida iha Kosta Sul ho naran Projetu Tasi-Mane. Projetu hirak ne'e hanesan: 1) Area ba baze forneselementu, fatin industria, Suai Foun, Aero-portu Suai, no fatin ba hakiak Lafa'ek sei lokaliza iha **Suai**; 2) Fatin ba Refinaria no Petrokimika, Sidade Petroleu (Betano Foun) iha **Betano**; 3) Fatin Planta LNG nian, Beaco Foun, Viqueque Foun, Aero-portu Viqueque estabelese iha **Beaco**; 4) **Auto-Estrada**: husi Suai ba Beaco.¹ Suai Supplly Base rasik nu'udar parte husi vizaun politiku Governu nian dezde iha inisiu 2008 nian.²

Governu halo ona prosesu lubuk ida hodi fo kontratu ba Kompania Eastlog husi Singapura iha 2010 hodi halo estudu viabilidade no dezeñu preliminar (*Front-End Engineering Design - FEED*) ba Supplly Base Suai. Iha 2012, Konsellu Ministru decide hodi kontinua indika Kompania Eastlog halo estudu kompletu ba projetu SSB hafoin analiza primeriu estudus Eastlog nian. No, sigundu kontratu maka Governu indika Kompania Eastlog atu jere konstrusaun Baze Fornesimentu, no tender ida ba konstrusaun SSB, durante semester sigundu tinan ida ne'e.³

Parte seluk maka durante 2011 to'o 2012 Governu hala'o ona survey ba fatin distinasaun projetu SSB liu husi Ekipa Konjunta Inter-Ministrial – EKI ne'ebé kompostu Ministériu Rekursu Minarai, Ministeriu Justisa, Ministeriu Agrikultór no Peskas, Sekretariu Estadu Meiu-Ambiente, Sekretariu Estadu Siguransa no Polisia Nasional Timor-Leste – PNTL. Nune'e mos EKI halo ona sosializasaun inklui identifika rai, plantasaun, ai-horis, fatin lulik, lagua lulik no semiteriu ne'ebé pública ona iha inisiu 2013, hein deit halo implementasaun projetu SSB refere.

Kontieudu husi estudu ida ne'e la'os atu dezafia planu Governu nian. Maibe atu analiza klean kona-bá oportunidade no ameasa sira ba SSB husi prespertina siguransa ne'ebé sai nu'udar tentativa ba estabilidade iha Timor-Leste. Mensiona mos pontu rekomendasaun balun ba Governu nu'udar rezultadu estudu ekipa Fundasaun Mahein hala'o durante Abril to'o Maiu 2013 nia laran.

II. Metodolojia

Iha estudu ida ne'e, Fundasaun Mahein halo entrevista ho comunidade afeitadu husi Suai Supplly Base, konversa pesoal ho juventude husi Suku Camanasa, halo diskusaun ho Lia Nain Camanasa, Autoridade lokal Suku Matai, Belakesak, Labarai no Camanasa. Nune'e mos halo observasaun direta ba fatin istalasaun SSB iha Camanasa inklui halo mos estudu ba relatoriu dahuluk sira husi Governu no Sosiadade Sivil hanesan La'o Hamutuk ne'ebé fo sai ona kona-bá implementasaun projetu nasional ida ne'e.

III. Oportunidade no Esperansa Komunitade ba SSB

¹ Dias, Juvinal (2013). Impaktu Tasi Mane ba ekonomia TL. Diskusaun entre La'o Hamutuk no ekipa Fundasaun Mahein.

² La'o Hamutuk, (2013, Maiu 3). Supply Base Suai: Parte hosi Projetu Infrastrutura Petróleu Tasi Mane. <http://www.laohamutuk.org/Oil/TasiMane/13SSBte.htm>

³ La'o Hamutuk, (2013, Maiu 3). Supply Base Suai: Parte hosi Projetu Infrastrutura Petróleu Tasi Mane. <http://www.laohamutuk.org/Oil/TasiMane/13SSBte.htm>

Política Governu ba projetu Suai Supply Base maka sei implementa projetu pakote sira hanesan hari'i Armajen no base forneselementu, Fatin Hakiak Lafaek, Aero-Portu, Nova Suai.⁴ No, projetu ketak ida maka Auto-Estrada maizumenus kilometru 150 ne'ebé sei liga Suai, Betano no Beacu-Distritu Viqueque.⁵

Husi projetu SSB ne'e, Governu nia espetativa katak sei fo benefisiu ekonomiku sustentavel ba longu prazu maka fo kampu serbisu ba comunidade, treinamentu no edukasaun, hamosu atividade negosiu foun iha comunidade, atrai investimentu husi seitor seluk, promove produktu lokal, hasa'e kresimentu ekonomia no Suai sai hanesan fatin negosiu iha Kosta Sul.⁶

Oportunidade seluk maka sei kria kampu serbisu (Direta) maizumenus ema 300 pesoas durante konstrusaun no ema 250 pesoas durante operasaun. Projetu ne'e mos sei uza (benefisia) kontrator lokal no nasional maizumenus 40% (periodu konstrusaun), fo serbisu (Indireta) ba timor-oan maizumenus 1,000 - 1,500 hanesan akomodasaun, restaurante, transportasaun, fatin turizmu inklui seluk tan.⁷

To'o ohin leron Governu gasta ona osan lubuk ida hanesan iha 2010 fo kontratu tokon \$3.4 ba Eastlog atu halo estudu viabilidade no dezeńu preliminar (*Front-End Engineering Design - FEED*) ba Supply Base Suai. Iha 2 Setembru 2011, Konsellu Ministru aprova Rezolusaun 26/2011 ne'ebé hateten katak kustu estimasaun atu hatudu faze primeiru husi Supply Base Suai sei gasta entre tokon \$273 no tokon \$347. Governu kontinua gasta osan hamutuk tokon \$11 durante 2012 no iha Osamentu Jeral Estadu – OJE 2013, Parlamentu Nasional aprova tan osamentu hamutuk tokon \$781 ba projetu SSB.⁸

Relatoriu husi Organizasaun Naun Governamental - ONG La'o Hamutuk dezafia política Governu kona-bá projetu SSB ne'ebé gasta ona osan barak tanba fo liu prioridade ba Industria Petroleu duke industria sustentavel seluk hanesan agrikultura ka industria ki'ik sira.⁹ Relatoriu La'o Hamutuk mos konsidera Governu susar rezolve numeru dezempregu iha Timor-Leste ne'ebé kada tinan-tinan aumenta.¹⁰ Faktus iha Timor-Leste kada tinan maizumenus ema 1,5000 maka buka kampu traballu.¹¹ Sekretariu Estadu Formasaun Profesional no Empregu – SEFOPE, Ilidio Ximenes rekuiñese katak kada tinan numeru dezempregu, tinan ida ne'e sae to'o 15% kompara ho tinan 2012 ne'ebé iha deit 12%.¹²

⁴ La'o Hamutuk. (2013, Maiu 03). Supply Base Suai Parte hosi Projetu Infrastrutura Petróleu Tasi Mane. <http://www.laohamutuk.org/Oil/TasiMane/13SSBte.htm>

⁵ La'o Hamutuk. (2013, Maiu 03). Supply Base Suai Parte hosi Projetu Infrastrutura Petróleu Tasi Mane <http://www.laohamutuk.org/Oil/TasiMane/13SSBte.htm#What>

⁶ Timor Gap. (2012, Outobru 25) Breves Informasaun Suai Supply Base Project. Apresentasaun Slide Show.p11-12 .

⁷ Timor Gap. (2012, Outobru 25). Breves Informasaun Suai Supply Base Project. <http://www.laohamutuk.org/Oil/TasiMane/2012/SSBIntro25Oct2012.pdf>

⁸ La'o Hamutuk. (2013, Maiu 03). Supply Base Suai Parte hosi Projetu Infrastrutura Petróleu Tasi Mane. <http://www.laohamutuk.org/Oil/TasiMane/13SSBte.htm>

⁹ La'o Hamutuk. (2013, Abril 19). Projeitu Tasi Mane Infraestruturua Mina Rai. <http://www.laohamutuk.org/Oil/TasiMane/11TasiManeTe.htm>

¹⁰ La'o Hamutuk. (2012, Julu 13). Hoban-an kle'an liu iha tahu mina-rai: <http://laohamutuk.blogspot.com/2012/07/hoban-klean-liu-ih-tahu-mina-rai.html>

¹¹ Dias, Juvinal. (2013, Abril). Impaktu Tasi Mane ba ekonomia TL. Diskusaun Fulan Naroman.

¹² Dare Matias, Santino. (2013, Abril 15). Nemeru dezempregu TL sae ba 15%, skill sai obstaklu ba Timo oan. Media Radio Liberdade.

IV. Komunitade nia Esperansa

a. Kompensasaun

Komunitade nia esperansa husi projetu Suai Supply Base maka kompensasaun husi Governu ba sira nia rai, natar no to'os, plantasaun, ai-horis inklui fatin lulik sira ne'ebé comunidade oferese atu implementa projetu nasional refere.¹³ Lia na'in no comunidade afeitadu husi projetu nasional husu Governu Timor-Leste, partikularmente Ministériu Petroliu no Rekursu Minarai atu fo kompensasaun ne'ebé bele garantia sustentabilidade moris comunidade iha futuru.¹⁴

“Ami nia riku-soin inklui ai-horis ne'ebé ami kuda iha to'os maka ami entrega hotu ona ba governu”, dehan Jorge Alves.¹⁵

Governu rasik promete ona ba comunidade afeitadu durante sosializasaun katak sei halo kompensasaun liu husi tipu rua maka kompensasaun “Direta no Indireta”.¹⁶ Kompensasaun “Direta” signifika wainhira hahu ona Governu dudu comunidade nia rai maka sei selu direta ai-horis no plantasaun sira ne'ebé tama ona iha area parcelas nian.¹⁷ Versaun comunidade Governu tenki selu plantasaun ka ai-horis ho folin \$.50.00 kada hun ida.¹⁸

Maibe informasaun ne'ebé Fundasaun Mahein rekolla durante monitorizasaun katak Governu rasik laiha eskplikasaun klaru kona-bá kompensasaun “Direta ne'e. Ezemplu; folin kada ai-horis ka plantasaun kada hun ida folin hira? No, bainhira maka Governu hahu halo kompensasaun?¹⁹

Esperansa seluk husi comunidade maka kona-bá kompensasaun “Indireta”. Tuir política Governu katak kompensasaun “Indireta” ne'e comunidade Camanasa sei hetan lukru 10% husi projetu SSB durante tinan Atus Ida Lima Nolu (150) bazeia ba kontratu entre Governu no Komunitade. No, Governu mos promete sei hari'i Fundasaun ida atu bele jere lukru 10% ne'e ba dezvoltimentu Suku Camanasa.²⁰

Bazeia ba monitorizasaun ekipa Fundasaun Mahein identifika katak asuntu kompensasaun “Indireta” Governu la esplika klaru kona-bá lukru 10% husi income SSB ba comunidade Camanasa iha futuru. Komunitade afeitadu sira nia hanoin katak lukru 10% ne'e Governu sei selu fulan-fulan \$.1000.00 ba kada ema ida durante tinan Atus Ida Lima Nolu nia laran.²¹

¹³ Bere, Donatus. Lia Nain Suku Camanasa. (2013, Maiu 02). Entrevista pesoal.

¹⁴ Tom. (2013, Abril 12). Supplay Base: Povu Kamanasa Hetan Pursentu 10. Media Timor Post.

¹⁵ Tom. (2013, Abril 12). Supplay Base: Povu Kamanasa Hetan Pursentu 10. Media Timor Post.

¹⁶ Maibe Governu la esplika klaru bainhira maka atu halo kompensasaun no prosesu kompensasaun ne'e oinsa? Laiha karta kontratu ida klaru entre Governu no Komunitade Camanasa kona-bá asuntu kompensasaun no benefisiu seluk husi projetu SSB iha futuru.

¹⁷ Alves, Jorge. Lia Nain Suku Camanasa. (2013, Maiu 02). Entrevista Pesoal.

¹⁸ Alves, Jorge. Lia Nain Suku Camanasa. (2013, Maiu 02). Entrevista pesoal.

¹⁹ Fundasaun Mahein hakarak konfirma informasaun kompensasaun husi parte Governu no haruka karta ba Minitériu Petroliu no Rekursu Minarais maibe laiha konfirmasaun to'o pública relatoriu.

²⁰ Tom. (2013, Abril 12). Supplay Base: Povu Kamanasa Hetan Pursentu 10. Publikasaun Media Timor Post.

²¹ Moniz, Afonso. Lia Nain Suku Camanasa. (2013, Maiu 02). Intevista pesoal

Nune'e mos wainhira hahu ona dudu sira nia rai maka Governu tenki konsidera sira nu'udar funsionariu públiku. Wainhira Governu la konsidera sira nia ejizensia hodi fo subsidiu fulan-fulan \$1000.00 kada ema ida inklui benefisiu seluk ne'ebé merese ba sira maka sira sei boikota fali sira nia rain, maske entrega ona ofisialmente ba Governu.²²

Governu tenki sosializa fila fali hodi distribui informasaun ida detallu kona-bá kompensasaun "Indireta" ka lukru 10% no benefisiu seluk ne'ebé Governu promete hafoin komidade entrega ofisialmente entrega rai iha inisiu fulan Abril, tinan ida ne'e.²³ Konstituisaun mos garante kona-bá diretu indeminizasaun ne'ebé lolos tuir lei haruka wainhira Governu atu hasai ema nia propriedade privadu ba uzu públiku nian.²⁴

b. Kampu Traballu

Kampu traballu nu'udar esperansa profunda husi Komidade afeitadu sira ne'ebé oferese ona sira nia rai no riku-soin ba Governu. Ejizensia husi komidade afeitadu no lia nain sira maka Governu tenki fo prioridade uluk ba sira nia familia atu hetan serbisu wainhira implemeta ona projetu SSB no Nova Suai. No, wainhira hahu ona dudu sira nia rai maka Governu tenki konsidera ona sira nu'udar funsionariu públiku.²⁵

Traballador la'os deit komidade Camanasa ne'ebé dadaun hela iha Timor-Leste maibe Suai oan sira ne'ebé durante ne'e estuda iha rai liur tenki sai prioridade antes rekruta traballador husi Distritu seluk.²⁶ Governu rasik konkorda ho ejizensia husi komidade no dadaun fasilita kursu lingua Inglesh nomos sei loke kursu tekniku enjineria nia ba juventude Suku Camanasa atu bele hetan *skill* ida naton hodi serbisu wainhira implementa ona projetu nasional ne'e.²⁷

Iha Timor-Leste kresementu numeru dezempregu aumenta sa'e kada tinan-tinan,²⁸ no maizumenus 15.000 pessoas juventude ne'ebé buka kampu traballu nian.²⁹ Tuir Peskizador La'o Hamutuk Juvinal Dias katak projetu SSB sei la rezolve problema dezempregu iha Timor-Leste, sei la fo serbisu hotu Suai nia oan, sei fo benefisiu barak ba ema estranjeirus. Nune'e mos SSB nu'udar projetu nasional ne'ebé timor-oan hotu-hotu iha diretu atu hetan serbisu, wainhira iha diskriminasaun maka sei hamosu konfliktu entre timor-oan iha futuro.³⁰

²² Bere, Donatus. Lia Nain Suku Camanasa. (2013, Maiu 02). Entrevista Pesoad.

²³ Nax. (2013, Abril 12). Suai Entrega Rai Hektares 1113 Hari'i Supplay Base. Media Diariu Nasional.p1.

²⁴ Konstituisaun RDTL: Artigu 54 Alineia 3.

²⁵ Amaral, Clementino. Lia Nain Suku Camanasa. (2013, Maiu 02). Entrevista pesoal.

²⁶ La'o Hamutuk, (2012, Maiu 3). Supply Base Suai Parte hosi Projetu Infrastrutura Petróleu Tasi Mane: Relatoriu L<http://www.laohamutuk.org/Oil/TasiMane/13SSBte.htm#What>

²⁷ Esplikasaun husi Lian Na'in Camanasa ba ekipa Fundasaun Mahein durante halo monitorizasaun iha Suai, Maiu 2013.

²⁸ Matias Dare, Santino. (2013, Abril 15). Nemeru dezempregu TL sae ba 15%, skill sai obstaklu ba Timo oan: <http://radioliberaldadedili.com/notisia/983-nemeru-dezempregu-tl-sae-ba-15-skill-sai-obstaklu-ba-timo-oan>

²⁹ Dias, Juvinal. Peskizador La'o Hamutuk. (2013, Abril). mpaktu Tasi Mane ba ekonomia TL. Diskusaun ho ekipa Fundasaun Mahein.

³⁰ Dias, Juvinal. (2013, Marsu). Impaktu Tasi Mane ba ekonomia TL; Diskusaun Fulan Naroman.

c. Nova Suai³¹

Sidade foun (Nova Suai) nu'udar esperansa husi komunidadade afeitadu atu hela. Komunidadade hirak ne'e mai husi Suku Hat hanesan Suku Camanasa, Matai, Labarai no Belakesak.³² Tuir dezeńu Nova Suai ne'ebé lusu ne'e sei okupa rai maizumenus hektare 213 ho modelu hanesan Villa ne'ebé boot sei lokaliza iha aldeia Dais, Suku Labarai no Matai.³³

Dezeńa Nova Suai



Fontes: Lao Hamutuk

Autoridade lokal no Lia Na'in husi Suku Hat (Camanasa, Matai, Labarai no Belakesak) hotu-hotu hakarak sira nia komunidadade hela iha sidade foun, Nova Suai.³⁴ Maibe Governu rasik la esplika klaru ba komunidadade afeitadu sira durante sosializasaun kona-bá se maka merese atu hela iha sidade foun ne'e. Governu dehan deit katak Nova Suai otomatikamente ema maka hela, la'os animal.³⁵

Tuir relatoriu La'o Hamutuk relata lolos ne'e sidade Nova Suai atu halo ba traballdor sira maibe Governu kontinua taka informasaun Nova Suai ne'e ba traballador lokal ka estrajeiru.³⁶ Ministru Petroliu no Rekursu Minarais ne'ebé reprezenta Governu durante periodu sosializasaun laiha seriadade atu fo informasaun ne'ebé adekuaudu ba ninia komunidadade kona-bá sira nia moris iha futuru, liu-liu komunidadade sira ne'ebé sai afeitadu husi mega projetu ne'e.³⁷

³¹ Atu hetan infomasaun balansu husi parte Governu kona-bá asuntu Nova Suai se maka merese atu hela, Fundasaun Mahein haruka karta ba Ministru Petroliu no Rekursu Minarai iha (12/08) ba Ministru Petroliu no Rekursu Minarai, Alfredo Pires maibe laiha konfirmasaun to'o públikasaun relatoriu ne'e. FM koko dala barak ona liu husi staf Palmira liu husi telefone 3339178.

³² Ekipa Fundasaun Mahein halo entrevista ho lider komunitaria husi Suku Hat (Camanasa, Labarai, Matai no Belakesak) hotu-hotu ejize atu sira nia komunidadade ne'ebé afeitadu atu bele hela iha Nova Suai.

³³ La'o Hamutuk. (2012, Outobru 25). Breves Informasaun Suai Supply Base Project:

<http://www.laohamutuk.org/Oil/TasiMane/2012/SSBIntro25Oct2012.pdf>

³⁴ Lider komunitaria husi Xefi Suku Matai, Labarai no Xefi Suku Belakesak ne'ebé ninia komunidadade hetan afeitadu husi projetu SSB ne'e hakarak hotu atu hela iha sidade Nova Suai.

³⁵ Bere, Donatus. Lian Nain Suku Camanasa. (2013, Maiu 01). Entrevista Pesoal.

³⁶ La'o Hamutuk. (2012, Maiu 03). Supply Base Suai Parte hosi Projetu Infrastrutura Petróleu Tasi Mane. <http://www.laohamutuk.org/Oil/TasiMane/13SSBte.htm#land>

³⁷ Fontes Fundasaun Mahein (2013, Julu 20). Entrevista pesoal.

V. Impaktu Husi Projetu SSB

a. Rai Produtivu (Agrikultór)

Husi monitorizasaun Fundasaun Mahein katak area projetu SSB ne'e nu'udar area produtivu (area agrikultór) ne'ebé durante ne'e comunidade uza halo to'os no natar. La'o Hamutuk nia relatoriu mos kestiaona projetu SSB ne'e lokaliza iha rai agrikultura, area atu hakiak animal, area ba rekursu ba nesesidade tradisionál comunidade no fatin ba peskadór sira atu tau sira nia ró, inklui fatin ba comunidade sira atu prodúz masin hodi sustenta sira moris.³⁸

Tuir mapa projetu SSB sei okupa rai produtivu sira Suku Camanasa hamutuk hektare 1.113 ne'ebé fahe ba parte Tolu; hektare 125 ba Baze Fornesementu, hektare 781.57 ba Fatin Industria Mina no Gas, hektare 81.43 ba Fatin Hakiak Lafaek no hektare 213 ba konstrusaun Nova Suai ne'ebé distina iha aldeia Dais Suku Labarai no Matai.³⁹

Komunidade barak preokupa tanba sei dudu hotu sira nia natar no to'os inklui fatin lulik sira ne'ebé bele fo ameasa ba sira nia moris, comunidade sira entrega ona sira rai agrikultór no sei susar atu hetan rai hodi halo to'os no natar iha futuru.⁴⁰ Faktus hatudu katak total uma-kain maizumenus liu 726 iha Suku Camanasa maioria moris ho vida agrikultór no peskas.⁴¹

Ne'e bele hamosu impaktu ba comunidade iha aspeitu ekonomia, ambiental nomos kultural nian. Maske povu apoiu planu Governu atu halo dezvoltamentu maibe mos povu labele sai vitima ba polítika dezvoltamentu ne'e rasik.⁴²

b. Natar no To'os

Impaktu seluk husi projetu SSB maka comunidade sei lakon sira nia natar no to'os. Informasaun ne'ebé Fundasaun Mahein rekoilla durante monitorizasaun katak comunidade afeitadu husi projetu SSB maioria moris ho vida agrikultór no peska inklui comunidade afeitadu projetu Nova Suai.⁴³

Tuir dadus Ekipa Inter-Ministerial ne'ebé halo identifikasaun kona-bá ai-horis sira husi comunidade afeitadu sira iha area SSB tuir kategoria rua maka hanesan deskerve spesifikamente iha tabela tuir mai ne'e:

³⁸ La'o Hamutuk. (2013, Maiu 03). Supply Base Suai: Parte hosi Projetu Infrastrutura Petróleu Tasi Mane; <http://www.laohamutuk.org/Oil/TasiMane/13SSBte.htm#community>

³⁹ Timor Gap. (2012, Outobru 25). Programa Libertasaun Rai ba Projetu Suai Supply Base (SSB) & Nova Suai. Power point.p14.

⁴⁰ Amaral, Clementino. Lia Nain Camanasa. (2013, Maiu 02). Entrevista Pesoal.

⁴¹ Dadus Sensus Estatistika 2010. Informasaun ne'e bele mos asesu iha link ne'e; <http://artekulturakamanasa.blogspot.com/2011/10/preokupasaun-komunidade-kamanasa-ba.html>

⁴² Alves, Jorge. Lia Nain Camanasa. (2013, Maiu 02). Entrevista pesoal.

⁴³ Moniz, Afonso, Alves Jorge. Lia Nain Suku Camanasa.(2013, Maiu 02). Entrevista pesoal.

Tipu Fruitikultura (Aifuan)

No.	Tipu Fruitikultura	Unidade	Kuantidade
1	Aidila	hun	5,080
2	Hudi	Klobor	4,961
3	Sabraka	hun	457
4	Derok	hun	152
5	Ainanas	hun	8,231
6	Guiava	hun	302
7	Kulu Jaka	hun	260
8	Kulu Modo	hun	100
9	Has	hun	795
10	Bilimbi	hun	28
11	Durian	hun	0
12	Jambu be'e	hun	53
13	Aiata	hun	0
14	Avocate	hun	0
15	Kulu tunu	hun	0
16	Rumao	hun	160
17	Jambu Biji	hun	196
18	Jambu Buah	hun	49

Fontes: Ekipa Konjunta Inter-Ministêrial 2012

Tipu Alimenta (Aihan & Modo)

No.	Tipu Alimentar	Unidade	Kuantidade
1	Batar	Sakas	34,531
2	Hare	Sakas	5,650
3	Aifarina	hun	15,259
4	Kumbili	hun	14,763
5	Fehuk	beden	19,440
6	Uhi	hun	4,845
7	Talas	hun	10,139
8	Foremungu	Sakas	1,117
9	Forekeli	Sakas	25,250
10	Forerai	Sakas	29,421
11	Kontas	Sakas	471
12	Maek	hun	2,197
13	Kabubun	hun	185

No.	Tipu Holtikultura	Unidade	Kuantidade
1	Modo	beden	2,763
2	Brinjela	hun	6,401
3	Aimanas	hun	5,769
4	Tomate	hun	4,007
5	Baria	hun	161
6	Lakeru	hun	190
7	Ailia	hun	44
8	Ruku	hun	48
9	Li'is	hun	40
10	Koto	hun	0
11	Aifunan	hun	77

Fontes: Ekipa Konjunta Inter-Ministêrial 2012

Tabela iha leten hatudu katak komunidadade sei lakon sira nia rendementu (osan) lor-loron ne'ebé mai husi faan aifuan, modo tahan, hare'e no batar no riku-soin seluk husi natureza ne'ebé iha valor ekonomiku.⁴⁴

Governu presiza kria polítika ne'ebé bele fo sustentabilidade ekonomikamente ba komunidadade nia moris ba longu prazu nian. Se lae komunidadade bele hetan krizi ai-han ba komunidadade iha futuru. Wainhira krizi ai-han mosu sei fo ameasa ba komunidadade nia moris nomos bele fo impaktu estabilidade polítika no siguransa nasional.⁴⁵

c. Plantasaun no Ai-horis

Projetu SSB mos sei estraga plantasaun no ai-horis komunidadade nian. Tuir monitorizasaun Fundasaun Mahein hatudu katak area projetu SSB ho luan 1.113 hektare ne'e la'os deit rai ba natar no to'os maibe mos nakonu ho plantasaun sira ho valor ekonomiku ne'ebé garante moris komunidadade.⁴⁶ Ezemplu Ai-Teka, Nu'u, Kami'i, Kaiju no seluk tan ne'ebé bele fo rendementu ba komunidadade nia moris.

Plantasaun no ai-horis ne'ebé sei hetan impaktu husi projetu SSB maka hanesan lista ona iha tabela okos. Dadus ne'e mai husi Ekipa Konjunta Inter-Ministêrial ne'ebé halo indentifikasaun iha periodu 2012.

⁴⁴ Moniz, Afonso. Lia Nain Suku Camanasa. (2013, Maiu 01). Entrevista pesoal.

⁴⁵ Fundasaun Mahein. (2013, Maiu 08). Ameasa Ohin Loron no ba Jerasaun Foun: Prespetiva Ambiental Implika ba Siguransa Nasional. Mahein Nia Lian Nú.51.pdf.

⁴⁶ Bazeia ba monitorizasaun ekipa Fundasaun Mahein iha area SSB hanesan Aldeia Sanfuk Suku Camanasa nakonu ho ai-teka nomos Aldeia Loho-Rai Duku Matai (fatin aero portu) nakonu ho plantasaun Nu'u no Ai-Teka.

Tipu Floresta

No.	Tipo Floresta	Unidade	Kuantidade
1	Ai-Teka	hun	68,069
1.A	Ai-Teka ki'ik	hun	32,889
1.B	Ai-Teka <15 cmD	hun	16,876
1.C	Ai-Teka >15 cmD	hun	18,304
2	Mahoni		32
2.A	Mahoni ki'ik	hun	0
2.B	Mahoni <15 cmD	hun	32
2.C	Mahoni >15 cmD	hun	0
3	Gamelina		1,690
3.A	Gamelina ki'ik	hun	506
3.B	Gamelina <15 cmD	hun	471
3.C	Gamelina >15 cmD	hun	713
4	Ai-Kameli		436
4.A	Ai-Kameli ki'ik	hun	81
4.B	Ai-Kameli <15 cmD	hun	242
4.C	Ai-Kameli >15 cmD	hun	113

Tipu Plantasaun

No.	Tipo Plantas	Unidade	Kuantidade
1	Nu'u	hun	4,454
1.A	Seidauk Fuan	hun	1,688
1.B	Fuan ona	hun	2,766
2	Kaiju	hun	2,897
2.A	Seidauk Fuan	hun	10
2.B	Fuan ona	hun	2,887
3	Kami'i	hun	1,106
4	Kakao	hun	16
5	Tohu	Klobor	310
6	Bua	hun	1,908
7	Malus	hun	1,189

Fontes: Dados husi Ekipa Konjunta Inter-Ministerial 2012

Komunidade sira senti preokupa ho sira plantasaun no ai-horis ne'ebé durante ne'e uza ba sira nia nesesidade. Relatoriu La'o Hamutuk relata katak komunidade sei susar atu hetan ai riin no tali-tahan sekuandu atu hari'i no hadia uma lulik iha futuru, tanba komunidade fahe tiha ona rai ba malu ne'ebé entrega hotu ona ba Governu atu hari'i SSB.⁴⁷

Tan ne'e Komunidade husu Governu tenki selu tuir volume ai (ai hun boot-ki'ik) no kuantidade produsaun. Governu mos tenki selu "Tali-Tahan" ne'ebé iha sira nia natar no to'os. Pelu kontrariu, tuir esplikasaun Ekipa Konjunta Inter-Ministériál Hanesan Ministeriu Petorliu no Rekursu Minarais, Ministeriu Agrikultura no Peskas sei la selu tanba ne'e mai husi natureza rasik, laiha valor ekonomiku.⁴⁸

d. Fatin Hakiak Animal

Tuir dados ne'ebé Ekipa Konjunta Inter-Ministériál rekoilla ona katak maizumenus balada luhan hamutuk 125 maka sei hetan afeitadu. Animal hirak ne'e hanesan Karau, Kuda, Bibi no Fahi ne'ebé tama iha area SSB no Nova Suai.

Tipu Pekuaria

Area/Tipo Dadas	Karau	Fahi	Kuda	Bibi	Balada Nai'in	Balada Luhan Afeitadu
SSB	2,484	535	30	103	287	125
Nova Suai	223	210	7	21	46	
Total	2,707	745	37	124	333	125

Fontes: Dados husi Ekipa Konjunta Inter-Ministériál 2012

Husi tabela iha leten hatudu katak fatin animal (balada luhan) lubuk ida maka sei hetan estragus husi projetu SSB no Nova Suai. Sentimentu triste ida mai husi komunidade (karau-

⁴⁷ La'o Hamutuk. (2013, Maiu 03). Supply Base Suai Parte hosi Projetu Infrastrutura Petróleu Tasi Mane. <http://www.laohamutuk.org/Oil/TasiMane/13SSBte.htm#community>

⁴⁸ Fontes FM. Komunidade Afeitadu Suku Camanasa. (2013, Maiu 02). Entrevista pesoal

nain) katak projetu SSB fo impaktu boot ba animal sira hanesan Karau, Kuda no Bibi atu hetan ai-han (du'ut) matak no We ne'ebé suficiente sekuandu implementa ona projetu ne'e.⁴⁹

Ezemplu konkretu ida maka lagua Wedare ne'ebé durante ne'e fornese we ba comunidade Aldeia Sanfuk sei taka tanba Governu identifika ona atu sai fatin ba hakiak Lafaek. Maibe tristeza boot maka comunidade balun inklui lia na'in sira husi Camanasa seidak hatene lolos kona-bá fatin hakiak Lafaek.⁵⁰

Nune'e mos Karau iha Suku Matai, partikulamente Aldeia Loho-Rai ne'ebé tama Aero-Portu mos hetan impaktu husi projetu SSB ne'e. Maske fo impaktu boot ba comunidade nia animal maibe balun komesa ona kesi no lori sai sira nia karau ba foho (villa antigu) ne'ebé ladun iha kondisaun ai-han no We.⁵¹ Tuir Fundasaun Mahein ne'e bele afeita ba animal (karau) nia saude ne'ebé prejudika mate no comunidade labele uza hodi halai natar, realidade iha Suai maioria comunidade sei halo natar ho sistema tradisional.

e. Lagua Lulik no Semiteru

Fatin importante sira ne'ebé sei hetan impaktu husi projetu SSB maka Hali Lulik iha Camanasa, Knua Camanasa Antigu, Knua Sanfuk Antigu⁵², Semiteru Sanfuk ho rate ± 320, Semiteru Dais ± 460, Semiteru Tuan Du'ut Loloba ± 21, Semiteru, Rate Antigu (Dom) Sanfuk⁵³ no Lagua lulik sira hanesan We-dare, We Mohut, Wehasan Mali Loek, Lagua Seuk-Lae, Lagua Siku At no seluk-seluk tan.⁵⁴

Tuir kultural timor-oan katak buat ida lulik ne'e sagradu ne'ebé wainhira hetan estraga (dudu) sei fo ameasa ba ema nia moris.⁵⁵ Presizamente halo uluk prosesu tradisional hodi nune'e labele fo impaktu ba comunidade, se lae lulik bele fo malisan hanesan moras ka dezastre naturais ne'ebé bele afeita ba comunidade nia moris.⁵⁶

VI. Ameasa Sira Husi Projetu SSB iha Futuru

a. Ameasa Konflitu Kona-bá Rai

Kestaun rai nu'udar asuntu ida ne'ebé iha tendensia boot hodi hamosu konflitu entre comunidade wainhira implementa projetu SSB. Liu-liu problema kona-bá rai entre comunidade Dais no Sanfuk ne'ebé sempre hamosu konflitu hahu husi tempu Indonezia ne'ebé to'o ohin lora seidak iha solusaun.⁵⁷ Pior liu tan maka comunidade Camanasa

⁴⁹ Amaral, Clementino. Animal Nain iha Aldeia Sanfuk. (2013, Maiu 02). Intervista Pesoa.

⁵⁰ Amaral, Clementino. Animal Nain iha Aldeia Sanfuk. (2013, Maiu 02). Intervista Pesoa

⁵¹ Safera, Vicente. Xefi Suku Matai. (2013, Maiu 02). Intervista Pesoa.

⁵² Timor Gap. (2012, Outobru 25). Programa Libertasaun Rai ba Projetu Suai Supply Base (SSB) & Nova Suai. Power Point. p23.

⁵³ Timor Gap. (2012, Outobru 25). Programa Libertasaun Rai ba Projetu Suai Supply Base (SSB) & Nova Suai. Power Point. p24.

⁵⁴ Timor Gap. (2012, Outobru 25). Programa Libertasaun Rai ba Projetu Suai Supply Base (SSB) & Nova Suai. Power Point. p26.

⁵⁵ Moniz, Afonso. Lia Nain Suku Camanasa. (2013, Maiu 01). Intervista pesoa.

⁵⁶ Trindade, Jose. (2011). Lulik: Valor Fundamental Timoroan

Nia. http://www.tlstudies.org/pdfs/TLSA%20Conf%202011/chp_02.pdf

⁵⁷ Alves, Jorge. Lia Nain Suku Camanasa. (2013, Maiu 02). Intervista pesoa.

lakohi comunidade Dais no Olbelis atu hetan diretu kompensasaun kona-bá rai, tanba konsidera hanesan ema okupante iha tempu Indonezia.⁵⁸ Parte comunidade Dais rasik kontinua halo rejistensia no kontra lia nain Camanasa hodi hetan diretu ba kompensasaun kona-bá rai, razaun sira hela ona tinan 30, hahu tempu Indonezia.⁵⁹

Maske Konstituisaun rasik garante katak sidadaun hotu-hotu iha diretu ba propriedade (rai) no diretu atu hela iha rai ne'ebé deit, iha teritoriu Timor-Leste.⁶⁰ Maibe kestaun boot ida maka iha Timor-Leste seidak iha definisaun nain ba rai la klaru kona-bá na'in ba rai tuir enkuadramentu legal ruma sai tentativa hodi hamosu konflitu entre comunidade ne'ebé ikus mai bele estraga estabilidade nasional.⁶¹

Tanba comunidade Dais ne'ebé maioria tama iha grupu Arte-Marsial durante ne'e sempre provoka konflitu, dala barak sira ameasa hodi blokeia dalan hodi buka ema Camanasa ne'ebé halo viazen mai Nasional.⁶²

Parte seluk Komunitade Camanasa balun ladun sastifas no konsidera Governu halo manipulasaun tanba promete wainhira entrega rai sei involve ho comunidade tomak maibe realidade bolu deit lia na'in ne'ebé la hatudu transpanparansia. Pior liu tan comunidade no lia na'in sira laiha foto-kopia karta deklarasaun kona-bá entrega rai no kompensasaun ne'ebé Governu ho comunidade konkorda ona.⁶³

b. Ameasa Konflitu Kona-bá Kampu Traballu

Kestaun kampu traballu mos nu'udar ameasa ida ne'ebé sei hamosu konflitu entre comunidade Suai iha futuru. Durante Fundasaun Mahein nia monitorizasaun maioria comunidade Suai hotu-hotu atu hetan serbisu iha projetu SSB. Maibe comunidade Suku Camanasa deklara sira maka merese no prioridade liu tanba entrega ona sira nia rai no riku-soin.⁶⁴ Entertantu juventude balun husi suku seluk iha Covalima la konkorda ho ejizensia comunidade Suku Camanasa tanba projetu SSB nu'udar projetu nasional ne'ebé sira mos merese atu serbisu.⁶⁵

“Projetu Oliu Pezadu ne'ebé uluk iha ami nia area, promete atu fo uluk serbisu ba ami, realidade traballador barak mai husi suku seluk, inklui mos traballador husi suku Camanasa rasik”. Dehan ju`ventude husi Depos.⁶⁶

⁵⁸ Alves, Jorge. Lia Nain Suku Camanasa. (2013, Maiu 02). Entrevista pesoal.

⁵⁹ Fontes FM. Komunitade Dais. (2013, Maiu 02). Entrevista pesoal.

⁶⁰ Konstituisaun RDTL: Artigu 54 Alineia 4 no Artigu 58.

⁶¹ Fundasaun Mahein. (2013, Abril 17). Disputa Rai Rohan Laek: Husi Prespetiva Siguransa. Mahein Nia Lian Nú. 48.pdf.

⁶² Fontes Fundasaun Mahein. (2013, Maiu). Entrevista pesoal.

⁶³ Informasaun ne'e Fundasaun Mahein rekolla husi comunidade Camanasa durante halo monitorizasaun, juventude balun kestiaona kona-bá asuntu ne'e, sira konsidera Governu halo manipulasaun ba prosesu enterga rai tanba dokumentu (akordu) kona-bá entrega rai no deklarasaun comunidade kona-bá kompensasaun ne'ebé asina ona entre lia nain no Governu mos la fo falu ba lian nain sira nu'udar evidensia ida.

⁶⁴ Alves, Jorge, Bere, Donatus. Lia Nain Camanasa. (2013, Maiu 01). Entrevista pesoal.

⁶⁵ Juventude Olbelis no Suai Villa. (2013, Abril 30). Entrevista Pesoal.

⁶⁶ Juventude Depos. (2013, Abril 30). Entrevista Pesoal.

Parte seluk komunidadade husi Dais mos la konkorda ho ejizensia komunidadade Camanasa ne'ebé husu Governu fo uluk prioridade serbisu ba sira tanba sira mos hetan afeitadu husi projetu SSB maske husi Suku seluk ne'ebé dadaun hela iha rai Camanasa.⁶⁷

Hare'e husi diferensia hanoin kona-bá kampu traballu husi komunidadade no juventude sira ne'ebé relata iha leten, tuir Fundasaun Mahein katak iha biban boot hamosu konfliktu wainhira implementa ona projetu SSB. Presiza kria mekanizmu rekrutamentu ne'ebé holistiku atu nune'e labele diskrimina fali traballdor husi suku no distritu seluk ne'ebé bele hamosu tensaun konfliktu iha futuru. Faktus iha Timor-Leste, numeru dezempregu kada tinan aumenta maizumenus joven liu 15.000 pesoas maka buka merkadu traballu nian.⁶⁸

c. Ameasa Konfliktu Kona-bá Nova Suai

Ameasa seluk ne'ebé bele mos kontribui ba konfliktu entre komunidadade maka kona-bá sidade foun ka Nova Suai. Tuir monitorizasaun ekipa Fundasaun Mahein komunidadade afeitadu husi Suku Hat hakarak hela iha Nova Suai.⁶⁹ Maibe Governu rasik laiha esplikasau klaru ba komunidadade se maka merese atu goza sidade lusu ne'e. Durante sosializasaun husi Ekipa Konjunta Inter-Ministerial komunidadade husu klarifikasaun kona-bá Nova Suai, Governu ho diplomasia hateten Nova Suai ne'e ema maka sei hela, la'os animal.⁷⁰

Tuir Fundasaun Mahein nia monitorizasaun idenfitika katak iha tendensia hadau malu Nova Suai entre komunidadade afeitadu husi Suku Hat. Komunidadade hirak ne'e hotu-hotu iha mehi atu hela iha sidade lusu ne'e. Parte komunidadade afeitadu Nova Suai, partikularmente Aldeia Dais lakohi komunidadade husi husi suku atu hela iha Nova Suai.⁷¹ Hetok at liu tan Governu la esplika klaru se maka atu hela iha Nova Suai. Xefi Suku Labarai ne'ebé hetan konfirmasaun mos seidak hatene lolos Nova Suai ne'e se maka atu hela, komunidadade afeitadu ka mala'e sira.⁷²

Bazeia ba ambisaun hadau malu Nova Suai entre komunidadade sira hatudu katak iha tendensia boot hodi hamosu konfliktu iha futuru. Fundasaun Mahein senti preokupa ba ho Governu ne'ebé hatudu deit dezeñu furak hodi manan konsensia komunidadade atu entrega rai maibe laiha balansu informasaun ne'ebé adekuadu ba ninia komunidadade kona-bá Nova Suai.

d. Ameasa Ambiental Ba Komunidadade, Animal no Balada-Fuik Sira

Kestaun ambiental mos sai ameasa seriu ida ba komunidadade, animal no balada-fuik sira nia moris iha futuru. Historia kauza primaria pobreza (kiak) iha Timor-Leste tanba degradasaun ambiental nu'udar kontributor maior ba vulnerabilidade nasaun ida ne'e.⁷³ Kestaun ameasa ambiental husi projetu SSB iha futuru kestiaona husi Fundasaun Haburas no husu Governu

⁶⁷ Gusmão, Agostinho. Komunidadade Aldeia Dais. (2013, Maiu 02). Entrevista Pesoal.

⁶⁸ Dias, Juvinal. (2013, Abril). Impaktu Tasi Mane ba ekonomia TL. Diskuasaun Fulan Naroman

⁶⁹ Xefi Suku Camanasa, Matai, Labarai no Belakesak. (2013, Maiu 02). Entrevista pesoal.

⁷⁰ Bere, Donatus. Lia Nain Camanasan. (2013, Maiu 01). Entrevista pesoal.

⁷¹ Autoridade lokal Dais. (2013, Maiu 02). Entrevista pesoal.

⁷² Moniz, Agapito. Xefi Suku Labarai. (2013, Maiu 02). Entrevista pesoal.

⁷³ Fundasaun Mahein. (2013, Maiu 08). Ameasa Ohin Loron no ba Jerasaun Foun: Prespetiva Ambiental Implika ba Siguransa Nasional. Mahein Nia Lian Nú.51.pdf.

atu halo estudu ida klean hodi labele minimiza produsaun agrikula komidade nian.⁷⁴ Nune'e mos relatoriu La'o Hamutuk relata presiza halo estudu fila fali kona-bá kestaun ambiental tanba Kompañia enjeneiru Australia *WorleyParsons* ne'ebé Governu kontratu iha 2011 hodi halo evaluasaun ba impaktu ambiental la fo informasaun ne'ebé propriu, relasiona ho limitasaun tempu no menus informasaun kona-bá projetu Suai Supply Base ne'e rasik.⁷⁵

Dadaun ne'e area ne'ebé kobre ba projetu SSB sei estraga rai bokur komidade, plantasaun, ai-horis no we matan ne'ebé durante ne'e fo ar fresku ba komidade, animal no balada-fuik sira. Presiza iha protesau, se lae bele hamosu bá-loron naruk, halo rai manas, ai sira mate hotu, laiha du'ut ba animal, rai nia bokur sai krekas wainhira laiha protesau no siguransa ba ambiente ne'ebé sustentavel.⁷⁶

Animal sira sei susar ba ai-han (duut) matak ne'ebé diak inklui We. Liu-liu maka Karau ne'ebé durante ne'e konsume We iha Laguna sira hanesan We-dare, We Mohut, Wehasan Mali Loek, Laguna Seuk-Lae, Laguna Sikun At no seluk-seluk tan sei okupa husi projetu SSB.⁷⁷ Nune'e mos balada-fuik sira hanesan manu Kakatua, manu Kakoak, manu Loriku, Niki sei lakon sira nia fatin (knuk) tanba sei tesi ai-boot ne'ebé durante fo mahon.⁷⁸ Fundasaun Mahein husu governu atu halo estudu ne'ebé klean ba impaktu ambiental antes implementa projetu Tasi-Mane, partikulamente baze forneseменту -SSB.⁷⁹

Konstituisaun Repúblika Demokrátika Timor-Leste – RDTL seksaun (f) garante objetivu estadu nian atu proteje didiak Meiu-Ambiente no tane nafatin riku-soin rai nian,⁸⁰ artigu 61 kona-bá diretu ambiental nomos artigu 139 kona-bá rekursu umanu sira.⁸¹ Meiu-ambiente ne'ebé diak importante ba agrikultor sira. Ho ambiente ne'ebé diak, agrikultor bele halo buat barak no bele hetan rendementu agrikola ne'ebé diak mos.⁸²

e. Ameasa Kultural ba Komidade Nia Moris

Maioria Timor-Leste moris ho kultura ka tradisaun ne'ebé metin no forte hanesan fatin lulik, rai lulik, ai lulik, bee lulik, uma lulik no seluk tan.⁸³ Tuir Monitorizasaun Fundasaun Mahein projetu SSB no Nova Suai sei afeita fatin lulik, rai lulik no lagua lulik inklui semiteru lubuk ida

⁷⁴ R-1. (2012, Setembru 17). Millaun \$15 gasta ona ba Projetu Tasi Mane. Media Bussiness Timor

⁷⁵ La'o Hamutuk. (2013, Maiu 03). Supply Base Suai Parte hosi Projetu Infrastrutura Petróleu Tasi Mane. <http://www.laohamutuk.org/Oil/TasiMane/13SSBte.htm#EIAdocs>

⁷⁶ Salsinha, Domingos. (2010, Dezembru 04). MANAJEMENTU NO PROTESAUN REKURSU NATURAI. <http://aplimentec-ong.blogspot.com/2010/12/manajementu-no-protesaun-rekursu.html>

⁷⁷ Timor Gap. (2012, Outobru 25). Programa Libertasaun Rai ba Projetu Suai Supply Base (SSB) & Nova Suai. Power Point.p26

⁷⁸ Timor Gap. (2012, Programa Libertasaun Rai ba Projetu Suai Supply Base (SSB) & Nova Suai. Power Point.p28.

⁷⁹ Jenova. (2012, Setembru 22). Ambiental Projeitu Tasi Mane Labele Minimija Ba Produsaun Agrikula. Media Online www.partidocnrt.com

⁸⁰ Konstituisaun RDTL: Artigu 6 seksaun f.

⁸¹ Fundasaun Haburas. (2009, Jullu 23). Denunsia Publika kona ba "Efeito Negativa ba saude publiku no degradasaun ambiental husi Konstrusaun Projektu Oli Pezado, iha Hera-Distritu Dili: <http://haburas.org/Denunsia%20kona%20ba%20Oli%20Pezado.pdf>

⁸² Fundasaun Mahein. (2013, Maiu 08). Ameasa Ohin Loron no ba Jerasaun Foun: Prespetiva Ambiental Implika ba Siguransa Nasional. Mahein Nia Lian Nú.51.pdf. p9.

⁸³ Trindade, Jose. (2011). Lulik: Valor Fundamental Timoroan Lulik. http://www.tlstudies.org/pdfs/TLISA%20Conf%202011/chp_02.pdf

iha area Camanasa no Dais nian. Komunitade rasik preokupa no triste ba sira nia fatin lulik sira, oinsa Estadu respeitu ba sira nia fatin lulik ne'ebé durante ne'e sira hahi no adora.⁸⁴

Ezemplu konkretu ida maka lagua lulik (We dare) ne'ebé Governu identifika ona atu halo ba fatin hakiak Lafaek. Maibe kestaun seriu ida maka durante monitorizasaun Fundasaun Mahein identifika katak komunitade no inklui lia na'in balun seidauk hatene klaru planu Governu kona-bá fatin hakiak Lafaek ne'e rasik.⁸⁵

Tuir Timor-oan nia fiar katak, bainhira iha ema ida kontra Lulik, nia sei hetan kastigu iha ninia moris. Kastigu ida ne'e la'ós de'it individual refere (ema ne'ebé kontra Lulik) maibe bele mos afeita ba ninia inan-aman, maun, alin, feton, ka membru familia seluk inklui ba komunitade tomak.⁸⁶ Lei inan rasik garante katak sidadaun tomak iha diretu atu goza no hari'i kultura hanesan obrigasaun atu haburas, defende nomos fo valor ba patrimoniun kultural nian.⁸⁷

Haktuir husi Lian Na'in Suku Camanasa katak lagua lulik sira ne'ebé partense ba area SSB iha mos avo Lafaek, no tuir lisan wainhira atu halo parede ba lagua lulik ne'e tenki halo uluk seremonia kultural, se lae bele fo ameasa ba sira nia moris.⁸⁸ Fundasaun Mahein husi Sekretariu Estadu Kultura atu hare'e kestaun ameasa kultural ne'e hamutuk ho lia na'in hodi buka solusaun atu nune'e labele hamosu impaktu negativu ba komunitade nia moris iha futuru.

VII. Konkluzau

Planu Estratejiku Dezenvovimentu Nasional - PEDN ne'ebé trasa ona husi Governu atu hari'i infra-estrutura iha Kosta Sul nu'udar mehi naruk ba dezenvovimentu ekonomiku nasaun no povu Timor-Leste nian. Partikularmente kona-bá mega projetu Suai Supply Base –SSB ne'ebé lokaliza iha Suku Camanasa – Distritu Covalima hetan ona sinal pozitivu tanba komunitade entrega ona sira nia rai ba Estadu atu implementa projetu refere.

Povu Timor-Leste iha esperansa boot ba política Governu kona-bá projetu Suai Supply Base, partikularmente komunitade Camanasa-Suai. Maske nune'e, iha esperansa boot komunitade nian, iha mos ameasa seluk ne'ebé hafalun an iha projetu SSB ne'ebé bele fo impaktu ba siguransa nasional wainhira projetu ne'e implementa. Hanesan komunitade la esklaresidu kona-bá diretu kompensasaun, disputa rai ne'ebé ladauk rezolve no ameasa sosial, kultural inklui ambiental ba komunitade iha futuru.

Presiza iha kontribuisaun husi entidade tomak iha nasaun ida ne'e hodi bele buka alternativu sira ne'ebé komprensivu no holistiku atu ne'e labele povu sai fali vitima ba política dezenvoliventu husi Governu no Estadu nian.

⁸⁴ Amaral, Clementino. Lia Nain Camanasa. (2013, Maiu 02). Entrevista pesoal.

⁸⁵ Moniz, Afonso. Lia Nain Camanasa. (2013, Maiu 01). Entrevista pesoal.

⁸⁶ Trindade, Jose. (2011). Lulik: Valor Fundamental Timoroan Nian: http://www.tlstudies.org/pdfs/TLSA%20Conf%202011/chp_02.pdf

⁸⁷ Konstituisaun RDTL: Artigu 59 Alinea 5.

⁸⁸ Alves, Jorge. Beioan Dom Camanasa. (2013, Maiu 02). Entrevista pesoal.

VIII. Rekomendasaun

1. Rekomenda ba Governu atu aslera lalais esbosu Lei kona-bá rai no lori ba Parlamentu Nasional atu halo aprovasaun hodi nune'e defini lolos nain ba rai. No, kontinua halo mediasaun hodi rezolve lalais problema rai entre Dais ho Sanfuk ne'ebé to'o ohin loron seidak rezolve atu bele evita tensaun konflitu entre komunidadade iha futuru.
2. Rekomenda ba Ministériu Petroliu no Rekursu Minarais no Sekretariu Estadu Meiu Ambiente atu kria mekanizmu legal hodi regula kompañia sira ne'ebé sei implementa projetu SSB atu nafatin garantia valor ba konservasaun ambiental hodi nune'e labele hamosu impaktu ne'ebé fo ameasa ba komunidadade nia moris no balada fuik sira.
3. Rekomenda ba Sekretariu Estadu Kultura kontinua garantia valor kultura povu Timor-Leste nian, partikularmente komunidadade Camanasa hodi kria mekanizmu ida ne'ebé adekuardu atu evita impaktu negativu husi ameasa kultural nia ba komunidadade nia moris.
4. Rekomenda ba Ministériu Petroliu no Rekursu Minarais inklui Timor Gap atu halo indeminizasaun lolos ba komunidadade afeitadu ne'ebé oferese ona sira rai no rikuso'in sira. No tenki esplika klaru kona-bá kompensasaun "indireta" inklui benefisiu seluk atu nune'e labele hamosu fali tensaun konflitu iha futuru.

Bibliografia

- Alves, Jorge. Lia Nain Suku Camanasa. (2013, Maiu 02).
Intervista pesoal.
- Amaral, Clementino. Lia Nain Suku Camanasa. (2013, Maiu 02).
Intervista pesoal.
- Alves, Jorge, Bere, Donatus. Lia Nain Camanasa. (2013, Maiu 01).
Intervista pesoal.
- Bere, Donatus. Lia Nain Camanasan. (2013, Maiu 01).
Intervista pesoal.
- Dias, Juvinal (2013). Impaktu Tasi Mane ba ekonomia TL. Diskusaun entre La'ó Hamutuk no ekipa Fundasaun Mahein.
- Dare Matias, Santino. (2013, Abril 15). Nemeru dezempregu TL sae ba 15%, skill sai obstaklu ba Timo oan. Media Radio Liberdade
- Dadus Sensus Estatistika 2010. Informasaun ne'e bele mos asesu iha link ne'e;
<http://artekulturakamanasa.blogspot.com/2011/10/preokupasaun-komunidade-kamanasa-ba.html>
- Fundasaun Mahein. (2013, Maiu 08). Ameasa Ohin Loron no ba Jerasaun Foun: Prespetiva Ambiental Implika ba Siguransa Nasional. Mahein Nia Lian Nú.51.pdf. p9.
- Fundasaun Haburas. (2009, Jullu 23). Denunsia Publika kona ba "Efeito Negativa ba saude publiku no degradasaun ambiental husi Konstrusaun Projektu Oli Pezado, iha Hera-Distritu Dili:
<http://haburas.org/Denunsia%20kona%20ba%20Oli%20Pezado.pdf>
- Gusmão, Agostinho. Komunidade Aldeia Dais. (2013, Maiu 02).
Intervista Pesoal.
- Jenova. (2012, Setembru 22). Ambiental Projeitu Tasi Mane Labele Minimija Ba Produsaun Agrikula. Media Online www.partidocrnt.com
- La'ó Hamutuk, (2013, Maiu 3). Supply Base Suai: Parte hosi Projeitu Infrastrutura Petróleu Tasi Mane. <http://www.laohamutuk.org/Oil/TasiMane/13SSBte.htm>
- La'ó Hamutuk.(2013, Maiu 03).Supply Base Suai Parte hosi Projeitu Infrastrutura Petróleu Tasi Mane. <http://www.laohamutuk.org/Oil/TasiMane/13SSBte.htm#land>
- Timor Gap. (2012, Outobru 25). Breves Informasaun Suai Supply Base Hamutuk. (2012, <http://www.laohamutuk.org/Oil/TasiMane/2012/SSBIntro25Oct2012.pdf>
- La'ó Hamutuk. (2012, Jullu 13). Hoban-an kle'an liu iha tahu mina-rai:
<http://laohamutuk.blogspot.com/2012/07/hoban-klean-liu-iha-tahu-mina-rai.html>
- Moniz, Afonso. Lia Nain Suku Camanasa. (2013, Maiu 01).
Intervista pesoal.

Moniz, Agapito. Xefi Suku Labarai. (2013, Maiu 02).
Intervista pesoal.

Trindade, Jose. (2011). Lulik: Valor Fundamental Timoroan Nian:
http://www.tlstudies.org/pdfs/TLSA%20Conf%202011/chp_02.pdf

Timor Gap. (2012, Outobru 25). Programa Libertasaun Rai ba Projetu Suai Supply Base
(SSB) & Nova Suai. Power Point.p26

Timor Gap. (2012, Programa Libertasaun Rai ba Projetu Suai Supply Base (SSB) & Nova
Suai. Power Point.p28.

Timor Gap. (2012, Outobru 25) Breves Informasaun Suai Supply Base Project.
Aprezentaun Slide Show.p11-12 .

Tom. (2013, Abril 12). Supplay Base: Povu Kamanasa Hetan Pursentu 10.
Media Timor Post.

Nax. (2013, Abril 12). Suai Entrega Rai Hektares 1113 Harii Supplay Base.
Media Diariu Nasional.p1.

R-1. (2012, Setembru 17). Millaun \$15 gasta ona ba Projetu Tasi Mane.
Media Bussiness Timor.

Safera, Vicente. Xefi Suku Matai. (2013, Maiu 02).
Intervista Pesoal.

Salsinha, Domingos. (2010, Dezembru 04). MANAJEMENTU NO PROTESAUN REKURSU
NATURAIS. <http://aplimentec-ong.blogspot.com/2010/12/manajementu-no-protesaun-rekursu.html>